

فتحي فرج

رسالة برنيس

شعر

الطبعة الأولى يولييه 2020

بطاقة الكتاب

رسالة برنيس	عنوان المؤلف
فتحي فرج	المؤلف
شعر	التصنيف
2020 - 10547	رقم الإيداع القانوني
978-977-6771-92-5	الترقيم الدولي
2020 625 الطبعة الأولى يوليه	رقم الإصدار الداخلي
100 صفحة	عدد الصفحات

جميع حقوق الطبع والنشر محفوظة للمؤلف، ولا يحق لأي دار نشر طبع ونشر وتوزيع الكتاب أو ترجمته أو الإقتباس منه أو نشره على النت الا بموافقة كتابية وموثقة من المؤلف

مؤسسة النيل والفرات للطبع والنشر والتوزيع

ثورة مصرية تشرق إبداعاً على الوطن العربي

رئيس مجلس الإدارة

ناجى عبد المنعم



رخصة مزاولة مهنة: 58365 - سجل تجاري: - 13242 / 2017 - بطاقة ضريبية: 35-01-572

عضو عامل باتحاد الناشرين المصريين رقم 941 لسنة 2018

هاتف: 01011256943 - 01116202218 - 01202541192 - تليفاكس: 020554372901

النيل والفرات nagyegy200064@gmail.com

النيل والفرات alnilwaalfourat@gmail.com

المقر الرئيسي: ج.م.ع محافظة الشرقية - العاشر من رمضان - مجاورة 13 - امام سنتر الـ 13 - عقار 304

على سبيل التقديم

كنا نعد التقريرية والمباشرة من عيوب النص وقصور المبدع حتى قدم التاريخ بيرم التونسي عبقرية العامية الذى كان يخشاه أمير الشعراء على الفصحى فقدم النص الذجلي المباشر بتماسك أركانه والتزامه بفتيات الخط الدرامى حتى أصبح مدرسة شعرية متفردة وجاء من بعده شعراء كثيرون شهد النص العامى تجديدا وتطورا على أيديهم

حتى وصلنا للشاعر المتفرد فتحنى فرج الذى احترف الكتابة من مدرسة قصيدة المشهد اليومي والذى ينقل من خلالها أدق التفاصيل بأبسط التعبيرات والصور الشعرية البسيطة ليقدم لنا نوعا راقيا من الشعر بعيدا عن الإسفاف والإبتذال وهذا الديوان الذى بين أيدينا (رسالة برنيس) ربما يحمل أبعادا وطنية وربما يركز على الجانب الإجتماعى للمشهد العام - فالمعنى فى باطن الشاعر - ولكنه فى النهاية يقدم لغة خاصة به ورؤية متفردة لا يكتبها إلا هو

ناجى عبد المنعم

الإهداء

إلى الأهل والأحباب
إلى بلدى ووطنى الأكبر
إلى قرائى الأعزاء
باكور أعمالى الشعرية
على أكون قد قدمت لكم
ما يليق بكم ويحترم عقولكم

الشاعر فتحى فرج

ابتسامة عام جديد

كل عام وانتِ حبيبتى
أحلى زهرة فى خيالى
وانتِ نبضة جوه قلبى
من عبير بستان بدالى
وابتسامة عام جديد
صورة أحلى بالوصال
والزهور معناها صورتك
تضوى فى الأغصان قبالى
دانتِ وطنى فى إقامتى
وانتِ سندی فى ارتحالى
وف دعائى يدوملى حبك
ويباركك فى عيالى فى كل عام

كل عام

أحلى كلمة الناس تقولها

كل عام وانتم بخير

كل عام مشغول بغيرها

نفسى عمرى يكون كبير

كل عام غرقان فى خيرها

وأفضل اشكى الحال عسير

ليه يانفسى بتشتكى حالك

دالسؤال ده اليوم خطير

والكلام طول عمره هيّين

عند كل الناس كتير

كل عام وانتم بخير

كل عام .. كل عام

الحسبة فى واحد

بيقولوا ان الخمسة تلاتة
اتنين واتنين وكمان واحد
معقول يجى العم شحاته
ويقول ان الخمسة دى واحد
فى الشكل صحيح إنها حلقة
تفردها تكون زى الواحد
مش آدم فى الأصل ده واحد
وجمال الدنيا دى فى واحد
وحبينا رسول الله واحد
والأب و أم ده كان واحد
وعرفت ان الحسبه دى واحد
وانا قلبى وعقلى فى شئ واحد
وبكن فيكون جل الواحد
سبحان الله هو الواحد

موال فى الحب

سهران ياليل بالقلم
فكرى معاه سارح
وارسم حروف بالخيال
ربّ العباد مانح
يا بحر موجك نغم
بينادى على المالح
لو نادى لينا الهوى
نلقى الشجر طارح
واحلم أطيير فى السما
لجل الهوى الصالح
مشتاق وقلبى انكوى
والحب كان جارح

عيد ميلاد

عيد ميلاد مبروك يا ولدى

وعيد ميلاد دستور لبلدى

قلت كام عمرك حبيبي

قال تمنيه وعشره عددى

والشموع بالفرحة ترقص

وادعى ربي يقوى زنى

والصغير فى ولادى دائماً

له مكان فى القلب عندى

عيد ميلاد مبروك يا هيمة

وعام جديد افرح يا ولدى

وابتدى المشوار فى بلدى

أحلى شمعة

أحلى شمعة فى عيد ميلاد
لأحلى بمسة فى البنات
يلا بينا اليوم ده نفرح
مش ف لحظه قول ساعات
وادعى ربي الفرحة تطرح
فرحتين من غير أهات
واحضن ايدها يوم ميلادها
يمكن أنجح فى الصفات
وف خيالى جواد واخذها
راح يطوف كل الجهات
والتقيتها الحلوه ضحكت
وف جمال بنت الذوات
وف ميلادها النسمة رقصت
قبل ما اطفى الشمعوات
يوم ميلاد ست البنات

المحامى الشاعر

بتقول محامى فى الجنج
كل القضايا لك منح
ولقيت هواك زى الشبح
بين السحاب نجمك سبح
ومن الشمال سلوم رفح
أعلى وسام ليك مقترح
ومن الصعيد أحلى فرح
ع النيل يهفهف شئ طرح
والورد يضحك فى الصحر
والطير يرفرف فى مرح
لجل ابن مصر واهلها

كل الحياة راح تنصلح
صدر المحاكم متسع
ولا مرة كانت تنجرح
وكلام جنابك فيه حكم
ساعة المداولة بينطرح
شاعر بتبحث فى الكلام
قلب القانون ليك انشرح
يا أحلى فرع لفوق سرح
سيد يا شاعر !!..

الخدمة العسكرية

خدمت زمان تراب وطنى
وانا فى الأصل شئ منه
وسام الجندى على صدرى
وطبعى الحب فى السنة
على الأصحاب منيش حاقدا
ولو ما تطلعتش القمة
وعشت حياه على قدى
ومش بطران على النعمة
رزقت بزوجة وبخلفة
ودقت حلاوة اللقمة
وفضل المولى كان واسع
وبحلم إنى فى الجنة

معنى حب

الحب يعنى البسمة
أول طريق البهدة
بالصبر تبقى معسلة
والحلم دنيا مطولة
لوجت فى يوم متقندله
الشر آخره الشندلة

إلى الشاعر الصقر

أجمل حروف ع الفيس

بعنيّ شوفتها

والله خدتنى شويتين

ولقيتنى يابا عشقتها

يا صقر طائر فى السما

بين المعانى كلها

حلمك علينا والنبي

خلينا نرسى ف أرضها

الى شاعر ابراهيم

وكأن الست اما تطبطب

على وجه رغيف

نفرح بقلوبنا ونتهنى

بجمال الريف

وتحس فى مرة بنبضاتك

ياكبير لحروف

نتمنى فى يوم راح نتقابل

ما نكونش ضيوف

الى شاعر البحر

قوم بس يا صاحبي
بلاش تحلم وتعيش فى خيال
ده الدنيا غرورة وكدايه
ودوامها محال
وحروفك بتلاغى النسمة
فى سما الموال

الى وطنى

باكتبك يا وطنى سلام
ونبضة من قلب انشغل بك
ورسالة بأحلى الكلام
مدادها شعور اسمه حبك
ومهما ادوق مر الليالى
سأحيا عمري فدا لأجلك

الى البحر

يا بحر موجك على !!

والسمك زغاريد

أنا نفسي أرمى الشبك

والقى الشبار فى الإيد

لكن منعنى الهوى

وحرمنى من التزويد

والبحر جابلى السمك

من غير شبك فى العيد

مشتاقين

مشتاقين الفرحة تكمل
وف طريق الخير تبان
والآ تاه الحب عندك
من ألعيب الشيطان
اسمعي وافهميني
خلى قلبك فيه مكان
عندي شكوى يا حبيبي
متقوليش فات الأوان
مشتاقين

كنت يوم عالشط ماشى
بعد ما الأوهام خادتنى
قلت ابوح بالشكوى يمكن

ألتقى الأحباب تغيتنى
والحكاية طويلة جداً
لو سبقنى الموت سكتنى
مدي إيدك وانقذنى
قبل مالأشواق تفوتنى
إلتقيتك نسمة طايره
بتناديلها الغرقانين
وف عينيك بحر واسع
ضل شطه السباحين
إسمحلى بفرصة تانيه
أروى قلبى بالحنين
مشتاقين لهواك يفضل
يمحى ويلات السنين
مشتاقين

إلى شاعر البحر

أنا قلت يوم أشكرك
يا صديقي عالواى فإى
علشان فى يوم تفتكر
تشرب معايا الشأى
وحيات غلوتك نعم
مقدرش اقولك باى
دا صحيح كلامك حكم
فى الماضى أو فى الجأى
انت بحر بيحتوى كل اللغات
والمعانى بتبتسم فيها الصفات
لجل قلب بيفتخر بالتضحيات
فى حياة الأب صارت ذكريات
لك يا بحر الشعر أجمل الدعوات
وكل خير يرتجى للآب آت

الأنا

معرّش ليه الأنا !!

دايماً بتقلقتنا

تمحى سعادة قلبنا

والكره بيصيبنا

ويضيع رباط الحياه

والشوق بيغلبنا

نفضل نعانى الألم

من شر عدّنا

ويدوق أسانا الضنا

وتلوم حبايبنا

يارب يسر لنا

خيراً يقربنا

ثبت لجاج الأنا

واصلح لنا قلوبنا

رسالة برنيس

على أرض بلادى عيون صاحيه
وف بر وبحر بتواصل
ملعون يا شيطان لما تفكر
يوم تزرع فى قلوبنا فواصل
هتلاقى جناحك يتكسر
ولا لحظة الجند بيتغافل
فى شمال أو شرق المحروسة
مش ممكن أبداً يتكاسل
وجنوب أو غرب تراب وطنى
فى قلوب الشعب المتواصل
على أرض بلادى

وتراب برنيس بيحني عريس
جات للأحضان أحلى عروسة
هتفت صواريخ باسم القادر
على راس النملة الننوسة
شافها الإرهاب ولأً وغادر
ماقدرش بيان ساعة الدوسة
وبعزم ولادنا وطيب خاطر
ظهرت خطواتها الملموسة
واشهد يازمان الجيش حاضر
على أرض بلدنا المحروسة
وأدعى الرحمن يفدى ولادى
وتعيش برنيس تحمى الوادى
على أرض بلادى !

خليها تعدى

خليها تعدى اليوم يا حبيب
أصل ابن فلان ده بتاع الأعيب
أنا شوفته بيرقص بالمشاريب
وبيجرى يهزل للمحاسيب
والقهوة بتجمع كل غريب
والشر بيعمى الناس وتعيب
معلش الفرصه اليوم ضاعت
ولا بد الحق فى يوم ها يصيب
خليها تعدى

صاحب الجزار

كل ما بتعانى من العوزة
تسبقنى وتضرب فى الخوزة
إزاي بس يا صاحبي تفوتنى
وتقول انا مشتاق للجوزة
راح أجيبك كيلوهين و مشفي
وعليهم حته من الموزة

زعبلة

زعبلة بيضرب بالقلّة
على نعمة أرغول فى الضلة
مش قادر يحكم أفعاله
ولا يبعد عن فكر الشلة
وانا ياما نصحته يصون حاله
يتفلسف برضه بميت علة
زعبلة بيتناسى الماضى
وبيكره مشروب الخلة
ويكاير بغرور وجغاطه
مع إنه ضعيف برضه وقلة
نظراته كئيبه وبسجارة
يا حلاوة الأولاد يامشالله
وافرحى يابهانه أوام يلا
الدنيا ماسيعاش زعبلة

فرصة ومضت

واتبددت فيك الأمانى
واتبدلت أحزان
واتغيرت حتى الهمم
ومشاعر الإنسان
معقولة ترضى الخصوم
وتهادن الطغيان
عمرى ماشوفتك يوم
راح تمشي ع القضبان
و ناديت لنور القمر
يروى أمل عطشان
تفرح معاك الصغار
وتعودك الأوطان

وف إيدي توب العلم
من أجود الأقطان
يلا ارفعه في السما
تضحكك الألوان
قالها الزعيم من زمن
خليك مع الشجعان
لكن لسانك سكت
أصبحت كالشيطان
وظلعت صورة شبح
وبتجرى ع الكتبان
ده الكيل يا صاحبي طفح
واتيتم الغلمان
راجع تحاسب مين
فرصة ومضت بزمان

كام في المية

باسأل نفسى كام في المية
لو مرينا بلحظة أسية
نقدر ننسى الحب شوية
أبدأ زي الهوى والمية
نحتاج بسمة ونحتاج نسمة
لو في إدينا لقمة هنية
تجري المية ياضي عنيا
نلقى الحب ده أصبح غية
على شباكنا شوفت يمامة
طلة بتضحك في الصباحية
رحت أسألها عن أحوالها
وَقَفْتُ لحظة تبص علىَّ
إوعاك تغدر أنا صحياك

عيني في عينك يسطا عطية
أنا ماقدرش أضحي بحبي
وأنسى فراخي في البنية
جاي تفرعني وتروعي
وبتسألني كام في المية
أنا معرفش احسبها بنسبة
و لا شرحولى حاجات من دية
إسأل قلبك لو ها يجاوبك
وإسأل برضه خالتي زكية
راح بتقولك إسأل نفسك
لو في مشاعرك نبضة وفيه
تلقى الدنيا ساعتها في كفة
واملى بكف الفرحة إيدي
وف لحظتها أقدر اقولك
وزن الحب ده كام في المية

نبح الخير

بلادى أرضها الجنة
ترابها أصل تكوينى
ونيلها بيجرى فى الجنة
ودم بيسرى فى جبينى
حببتى وعزها ولادى
ونبضى ونبض أحبابى
وذكرى فى عمر أجدادى
ونسمة حب على بابى
ياتبع الخير .. حببتى يامصر

حاولت كثير

حببتي عزها ف ديني
ونبع الدم من جيني
رواها بالكرم ربي
ونبتة عودها من طيني
وقلب كبير
حاولت اهدم في بستانها
وأدارى الحب قدامها
وأحرق ورد أغصانها
وتاه العقل فى التعبير
حاولت كثير
لمحنى الطير وأنا معدى

رمانى بوردة على خدى

وقاللى بضحكته هدى

بلاش الأسوة والتعكير

حاولت كتير

وفضل المولى كان واسع

ونور الفجر كان ساطع

لقيتها جنبى فى الواقع

بقلب يقاوم التغيير

حاولت كتير

الفكر الغبي

فى ناس عقولها مخربطة
وعلى الطريق متلخبطة
وسببها كتر الشخبطة
على صورة مش متزبطة
إرسم بقلمك يافتى
فَكَرْ لنفسك والوطن
لو ضل قلبك وانطوى
هاتموت فى أحضان المِحَن
دا الشمس بتلاغي القمر
وتزيد فى أرزاق البشر
و الزرع بالمية استوى
فرط ثماره وانتشر
إدعى لربك فى الصلا
ما تروحش للفكر الغبي
ده الأرض دايماً مخلصه ..
بتحن للشيخ والصبى **

إلى شاعر البحر

مآسى الحياة فى مصرف فاقوس
تطرطش علينا مزارع ناموس
وفيروس كورونا وضيق فى النفوس
حلاوتك ياسيد فى عقق السيجارة
وتحت العمارة وضى الفانوس
وتنزل صحابك تساعدك بهمة
وتحرس فى نمة وتحمى الرؤوس
كفاية علينا كتابة النهاردة
لئن النهاردة صفاء للنفوس
جمعة مباركة

الواد شلاطة

الواد شلاطة الفهلوى
دايماً في طبعه الهرتلة
إن رحت تطلب مصلحة
تلقى الحياة متعطلة
ولا مرة بطل فهلوة
ولا حتى يقضى المسألة
رابط في طوقه سلسلة
والوكسة دى متفصلة
ويقول على المخلص أذى
عاشق حبوب الهلوسة
مافهمش فضل المدرسة
ولا حتى كلمة كويسة
ده النملة حفظت أهلها
من جيش سليمان النبي
والملكة نكروا عرشها

من لفظ هدهد مش غبي
كل الأمور دي مرتبة
ماتجيش في قاعدة مصطبة
و رسالة من رب الورى
لقلوب عباده محببة
يعنى الحياة مش بالهوى
تجرى مع الريح والهوى
وإن قولت يوم أنا فهلوى
تسقط و تحتاج للدوى
يا شلاطة خليك جنبنا
وابعد عن الكيف القدر
وازرع فى قلبك حبنا
أو خُد من النار الحذر
ده الدنيا مهما تغرنا

لازم نأمن بالقدر
مره و حلاوته فى قلبنا
وألأمه تطهير للبشر
و الواد شلاطة

الله على حرفك

الله على حرفك ما تقوليش
و أقوم وأهتفك بالبقتيش
واتمنى الجمهور يشاركنى
على صقفه وفرحة ومش تهويش
ودعائى الغفران و الرحمة
إلى أم تفانت لجل نعيش

أحدث خبر

دائماً بنبحث عن خبر
أو عن عمل وسط الكلام
بنشوف كثير إن الأذى
فى نفوسنا ليه هو التمام
معرفةش ليه طول عمرنا
بنعيش حياتنا والسلام
معرفةش ليه من صغرنا
يموت الأمل جوه الخصام
أنظر لشمسك و القمر
و شوف حياتك تسوى كام
إعفق بإيدك ع الوتر
تلقى القمر يهوى الغرام
و احذف شيطانك بالحجر

قبل الغرق تحت الحرام

أسجد لربك فى السحر
قبل العظام ما تكون حطام
ده الكل طمعان فى الخبر
مين اللى يصعد للأمام
و الكل خايف م الأثر
فيروس ببسبح فى الغمام
الأرض عانت م الطاعون
و الناس فى غفلة على الدوام
و كرونة ايه راح تشغلك
عن ذكر ربك يا غلام
شيخنا الكبير اسجد تنول
كل الرضا تمحي الآلام
فيروس كورونا ها يمنعك

فضل الصلا يوم الزحام
ارجع لربك وافتخر
إنه الحليم ربّ الأنام
و بلاش تطير خلف الخبر
خليك كريم يوم لا تضام
مهما اختلف اسم المرض
الموت مؤكد مش كلام
و أنا عندي لك أحدث خبر
زرعوا الكرونا فى مختبر
حل البلاء بك فاصطبر
هاتلاقى ربك يوم جبر
شاف اللى صابر ع المحن
شاف اللى كبر و انتصر
مصر الحبيبة و شعبها
وقت الفتن أهل السلام

ڤيروس كورونا

ياما دقنا الأمراض وتعبنا
وده سر و ساكن فى قلوبنا
مقدرش الشيطان يلاعبنا
حبستنا كورونا المره دى
يا كورونا عملك غير صالح
ارجعى للمختبر الطالح
واشربى واتعنى من المالح
بالسم الهارى و لا تنادى
يا كورونا انصرفى بعيد عنّا
لو متنا فمثوانا الجنة
والجانى تتردى فى نحره

ولا يفضل فيروس بالوادي
إتقلت أبواب مساجدنا
و الأمر ده خارج عن إيدنا
وأقمن الصلوات فى بيوتنا
و لا يشبظ فيروس بسوادي
و الفجر اما الشيخ بيادن
أرواحنا بتجرى و تسبقنا
و الخنزب يرقص على بابنا
و لا يغرم كلمة ف إبعادي
ده الوهم يارب اليوم صابنا
و الذنب معلق فى رقابنا
يارب ارحمنا و أجدادنا
و تفرح فلذات أكبادى
و بلاش يا كورونا كده معانده

ارجعى للخفافيش والبانده
وما فيش فى قلوبنا لك مساندة ..
أشتاتاً أشتوت يا اسيادي
يا كورونا يجييك ويجييك ..
ويسرسب أحماض قنادييك
و يارب احفظنا و يحميك ..
من وطنى ومن كل بلادى

إلى شاعر الشرق

قولي بتفكر ليه كده
ليه يعني بتجرب تموت
مقدرش اشوف نفسى كده
و لا لحظة أكون جوه التابوت
و العمر ده شئى منتهى
ولا بد له عفة ريموت
ربك غفور كل الذنوب
من غير ما تتمنى السكوت.

إلى شاعر البحر

طب إمتى نساقر ونجيك
و النور يضحكلى ف قناديك
نصطاد البورى من المالح
و نكلبظ على شط نجيك
ونهنى البحر بخيراته
و يغنى الشعر فى مواويك
ويارب يزىح عنا الغمة
و نصوم و نصلى و ندعيك

الى الشاعر عبدالله الصقر

كان نفسى أزوركم واصطاد
واعزمكو في أكله على الإمة
لكني ياصاحبى انا مش عارف
أتهنى برحلة فى دى الغمة
يارب اكرمنا وعدّياها
واحفظنا ونطلع ع القمة

جدو آدم

جدو آدم بعد إذتك ...
والعتاب من ابن إبنك
ليه يا جدو طاوحت نفسك
تنسى آيه من الآيات
ده انت كنت ف أرض طاهرة
كل آيه شايفها ظاهرة
والوساوس كات مجاهرة
والحاجات والمحتاجات
تيته حوا بلاش نلومها
بين سكنوها وبين جنونها
يعنى كل الخير قبالتها

إيش تسوّى الميكروبات
والكورونا صحيح أدتنا
واتحبسنا جوه بيتنا
والمآسى كمان صابتنا
واتحررنا من الطاعات
وانت برضه يا جدو تشكر
لما قلت يارب إغفر!!
واستحييت وده كان مقدر
زينة الأرض البنات
دنيا حوا برضه جنه
حتى لو إبليس فتناً
الصلا بتمحى ذنوبنا
أو ظلام الذكريات
ياسلام والعبد ساجد

والإله سامع وشاهد
إرضى يامعبود بعابد ..
بضلت قلبه الشاشات
والخلاصة فى النهاية ..
جدو آدم كان بداية
والدعاء سر العناية ..
إرفع ياربّ الأفات

منحة شاعر البحر

منحة رمضان برضه شوية
على شاعر البحر فى امسيه
وصديقى الصقر سايب رنة
لصلاة العيد فى الصباحية
وانا كان أمنيتى تكون جامعة
تنزاحى ياكورونا الليلة دية
وساعتها ياصاحبى تكون أحلى
فى جلال المنحة الإلهيه

يامسحراتى

يامسحراتى ممنوع طوافك
من قبل تسعة أدخل ونام
قفلوا المساجد وانت بتنادي
إصحى ياشادى وجب الطعام
لو شرطى شافك تطع معادى
والطبله حتى وصوتك حرام
إسمع كلامى يامسحراتى
لا يجيك غرامه معرفش كام
أضبط موبايلك واحضن لحافك
ما تنامش إصحى لجل الصيام
لا تقول كورونا تمنع صيامك
ولا حتى كلمة وسط الزحام
يامسحراتى يامغنواتى
على دق قلبك صلى القيام رمضاآن كريم

دعاء رمضان

ربى يا عالم بالأسرار
داوى جراحنا وعلى هيبتنا
إرفع عَنَّا وباء غدار
كل عيون الشر وغيتنا
اجبر ضعف صغار وكبار
وارفع شأن جيوش دولتنا
أتمم لنا أيام رمضان
وليلة القدر تكون فرحتنا
بارك فى الأعمار والدار
صلى وسلم على قدوتنا

صرصار وجرادة

فى الوادى الأخضر يابو خالو
شغلتنى الأفكار كالعادة
ووقفت أتأمل فى حكاية
على قصة ماهيش كده معتادة
لو كنت معايا هاتتعجب
والأمر ده محتاج لشهادة
لا تقوللى فى جامعة كاليفورنيا
ولا بحث بيعطينا قلادة
أنا شاعر والقصة خدتنى
والضحكه رمتنى على وسادة
الصورة دى بعينى شايفها
صرصار بيغازل فى جرادة
شنباته بتلمسها تميل
انا قلت الحشرة دى قوادة
عشان فى قلوبنا الظنانه
خطفتنا عيوبنا وبزيادة

أتاريها من البخت صايبيها
بدور على عشوة إجاده
وكأن القصة فى معناها
الشجرة دى من حق جرادة
إيه خلى الصرصار يتعدى
ويحارب على أرض عباده
بقى يعنى لضعف المسكينه
الكارثه هتكمّل فى سواده
ده ف لدغة دبور يدفنهم
ولا تطغى الحشرات فى بلاده
أم نط الصرصار وتركها
مقدرش يتبت فى وتاده
دى ممالك بلغات مختلفه
وحياتها فى بساتين السادة

شهادة عبد

شهادة عبد بيحبك
بأن الرحمة فى قريك
وطول العام بنستنى
تعود من تانى يارمضان
ياضيف مكروم من المولى
بتعشق أسوته الدنيا
وذل الجوع مع الصايم
جراحه تحبها الأبدان
ورب الخلق يسمعنا
وباب الصوم بيجمعنا
ومهما تغيب شهور عنَّا
يغيب فى هلاك الحرمان
وتشهد يوم لقاء ربك
بفرحة عبده فى قيامك
وأخلص قلبه فى صيامك ..
وأحيا العمر بالقرآن

بلاش الخوف

بلاش الخوف عشان خاطرى

وخلى الفرحة تضحكى

واشوف الحزن بيوللى

وتفرح يا ضيا عيني

زواج مبروك ياواد يابنى

نجاحك فرحة تغلبنى

تزيل همى وتسبقتى

وصلاة الزين بتسقينى

ليالى الحزن بتعلم

وتحضر بالأنين قلبى

ولما الفرحة بتسلم

بيظهر نورها فى جبينى
والاقى الدنيا دى حلوة
ويعلى الدف بالعنوة

يحن الراست للغنوة
ونهر النيل بيروينى
حبيبى فى مقتبل عمرك
منايا تعيش على ودك
ونور الحب فى قلبك
وتسعد بالضنا عينى

فداك يا مصر

حبيبتى منورة دربى
قالتلى فى الغرام سطرين
سهرت فى بعدها أشكى
قابلى هواها بعد يومين
حاكيتلو حكايه وبشوقى
رسمنى ف قلبها شطرين
وصرت فى حبها العاشق
معطر توبى بالياسمين
زرعت الوادى والصحرا
لقيت النبتة طول شبرين
ونيلها بميته الصافيه
يناغى الورد ع الشطين

بلادى وعز أجدادى
ونبض القلب فى القطرين
وكل ولادى واحقادى
فداك ولو فى يوم الدين
فداك يا مصر

خبر مشبر

سألت نفسي ورحت أفكر
فى زيارة حلوه لله أشكر
لجل التراحم بلا تعسر
وظلعت بدرى فى يوم يُبشّر
بنعمه زايده الله أكبر
وفضلت أحلم بما تيسر
خد ياد يا عبده وشد جدو
سلمكو متعب وقفت اهزر
وفرحنا ساعه بلا تأثر..
سمعت منهم خبر مشبر
أغرب مفاجأة وشىء يحير
راجل باسمك ع انت يظهر
قلت ابن عمى لكنه أكبر
فتحى الكبير وانا ال أصغر

أصل الحكاية حرفى المكرر
أقدار بتحصل ومين يفسر
إسمى ف ديوانى أصبح منور
والنسخة طلعت وده المقدر
ياريتنى أعرف أطبع واغير
يعنى النهاردة الحظ كشر
أحرق كتابى واقعد معكر
واعيش حياتى أبنى واكسر
واقول لروحي بلاش توتر
جتنى السعادة فى بختى الازعر
زيارة بيضا وخبر مشبر
إهدينى ربي فى الأمر يسر
واقول لصاحبى مرسيه ياسكر
وحياتك ابني كتب وسطر
عنوان كتابى ع الفيس مشير
أهديه لوطنى بلا تأخر *****

ورد المحبة

ورد المحبة ما بيستخبي
دايماً منور والدنيا شبة
ولما تكبر ست الحبايب
يقوى ف قلوبنا بذر المحبة
فيه ناس بتفرح ومستحبه
تحصد نميمة بلسانها حبة
وناس بتكره كل المعايب
ولا يوم تقرب على المغبة
ورد المحبة ده أحلى ورد
جذره الأصيل ما بينقلعش
ولا يوم هاتعرف تقراه فى ورد
بتحسه روحك ما بينسمعش
بيعيش طبيعى فى أى أرض
دايماً فروعه ما بتقطعش

ورد المحبة يعنى الترابط
مسيحي مسلم ده ابن وطنى
تفيد له شمعه تقوى الروابط
يطير حمام السلام يعنى
ويملى قلب الشباب ضوابط
ويمحى نار الشيطان ده عنى
والاقي روى فى نن خلى
واشوف حنانه ياناس شاغلنى
ورد المحبة يعنى السلام
فى قلوب بتصنع تاريخ بلادى
قلوب رحيمة تنسى الخصام
بالخير حقيقى مده الأيادى
تنام وتصحى على الونام
لأهل وطنى مش للأعداى
دايماً تضحى مش بالكلام
والورد يضحك فى كل وادى

حكاية قرد

كان فيه قرد ونعجه أميرة
ماشيه فى وسط جنينه كبيرة
خدها القرد وراح يلعبها
تاهت النعجه بعيد عن بيتها
وده كان قصد القرد ساعتها
راح يتنطظ فوق الشجرة
يمسك فرع بإيده ويصرخ
إلحقى يامه لميمون يفتس
خافت النعجه ونطظ نطة
حاء - فاء - خاء - باء
صاحبى القرد فى لعبه غباء
يضحك ميمون الأنتيكة

وينزل يجرى كيف يشاء
قالت النعجه ده إنت حويط
يلا قرد بلاش تنطيط
قلت هانعب جيت وياك
ونسيت أهلى وبلدى هناك
ودينى يلا يا قرد لبيتنا
أنا معرفش مين حتنا
قالها إنسى يا نعجه شوية
ده حنا فى رحلة اليوم خلوية
قالت النعجه :-

حاء - فاء - خاء - باء

إنت حياتك كده هوجاء

صار الوقت علينا مساء

وانا وحشتنى عيلة الباء

خضرة وميه وأرض فضاء
أسرح والعب كده فى الدنيا
من غير ما عرف حرف هيجاء
وف يوم أبقى لحم عشاء
قال القرد عبارة خطيرة
ده انت يانعجه مالكيش خيرة
وانا وياك الليله عريس
قالت النعجة آه ياخسيس
دنا راح أجرى قبل الحيرة
عمرى ماعيش مع قرد أسيره
وانت. يارب كلاب عزبتنا
ترميك رمية جحش فكيرة
حاء - فاء - خاء - باء
حوشوا الفاجر خدنى هباء

على آخر ضوء

على آخر ضوء ساعة المغرب

بتأخذنى الأفكار وتجيبنى

معرفةش ازاي قلبى العاشق

ودانى على الشط وسابنى

على آخر ضوء

ولقيتها فى البر التانى

بتنادى علىّ أوام عدّى

بتقوللى تعالى ف أحضانى

أنا وحدى و إيدى على خدى

وعنيا وقلبي صحيح خدى

والمركب ماشيه على قدى

على آخر ضوء

أنا خير الأجناد يا بلادي
وبأرض الفيروز متمسك
طول عمرى بعلم أولادى
إزاي تتحمل من أجلك
وتعيش وتسابق فى الدنيا
ولا حتى يموتو فى غير حضنك
على آخر ضوء
وفضلت أحاكى الأوراق
و استنى تلاغينى النجمة
ولقيت الشمس فى يوم طالعة
يوم سته اكتوبر مبتسمة
وكان هناك مليون شمعة
بتنور مع أول نسمة
على آخر ضوء

ولا همه الضوء قام
واتحرك جيشنا المغوار
وف عز الظهر طلع
يضرب حصن الأشرار

عربات وجنود عبروا المية
كان وسط نهار
ما قالوش لو نرجع ونفكر
نبنى لنا جدار.
يحمينا مواجهة أعادينا
على خط النار.
واكتملت أفراحنا ياسينا
واكتوبر كان لنا فخر
على آخر ضوء

عش العصفورة

من بعد الفيلا المأثورة
اخترنا عش العصفورة
زي ما بتقول الأغنية
راح نرسم له أجمل صورة
فى عيننا وقلب السنيورة
يا حلاوته عش العصفورة
ده العش محندق وصغفن
والشمس بتطلع وتبوسه
وكأنه ياناس شاب مدلل
فى المغرب بتكون له عروسة
فضل الرحمن ظل علينا
ضحكتلى النعم المحبوسة
ولقينا الخير بين جدرانه
والفرحة فى عين الننوسة
بجوار البيت أسوار خضرة
مصفوفه وملامسها رزينه
والورد اللى عبيره زيادة

مزروع بالحب وبإيدينا
ألوانه الحلوه دى بتغنى
وف مسك الليل نغمه حنونه
بتقول لقلوبنا تقوم تجرى
تقابلنا فى زفة تنورة
عش العصفورة ده فوق شجرة
وازاي ده فى يوم بيقضينا
ونشوف خطاونا المعتبره
على فرع فى شجرة يقوم بينا
معقول تبتدد أحلامنا
وف دنيا الوهم تبكينا
أبدأ مش ممكن نطاوعها
وهاتسعد بالفرحة عيننا
ونتهنى ف عش العصفورة
يا حلاوته عش العصفورة

إسمحيلي

إسمحيلي النوبه يامه
روحي مشتاقه لضمه
تروى قلبى بالحنين
قبل وطنى ما ينادينى
وان رمانى الشوق فى حضنك
واشتهت أنفاسى عطرك
وبأيديك خدنى صدرك
أتركى الأشواق تجينى
اسمحيلي بكلمه حرة
إن خدتنى مصر منك
ما تقوليش إنى تركتك
مصر نورها بيلاغينى

ما اتولدش اللى يعاديها
أو فى يوم قرب عليها

إربطيه انتِ بإيديك
وف ثوانى ها تلاقينى
فوق كتافه ومن إيديه
فى بحور النار راميه
وبالتراب هاردم عليه
قبل عينه ما ترانينى
هما نسيوا تاريخ جدودى
إنى عمرى ما افوت حدودى
وان قابلنى فى يوم عذاب
هالتقيك بتواسينى
متخافيش أبداً يا أمى

ده الوفاء دائماً فى دمی

لو فى يوم بعدته عنى

يبقى حقك تبعدينى

ياما شوفت أمور عجيبة

فى ربوع مصر الحبيبة

خذنى قلبى وراح إليها

قبل ما انتِ تخبرينى

وف صلاتى على الدوام

أدعى ربي أكون تمام

وبشفاعة الزين شملنى

والأمان فى يوم يقينى

إسمحلى

العيش والملح

العيش والملح وعِشرتنا
دى معانى لا يمكن بتفوتنا
وقلوبنا صفاتها بتتغير
وده حالها فى كل الأزمان
من يوم ما طلعتنا الى الدنيا
وعرفنا اصحابنا وأهالينا
وعادات الريف قبل مدينه
مختلفة كمان فى البنيان
والدنيا مع الست البلدى
تقعد وتنادى ياسى عبده
اتفضل نعملك شاي
أو قهوه فى أحسن فنجان

والنبي ده الراجل وصانى
عن واجبى إلى كل جيرانى
والحال بيقول إنى جريئه
فى حضوره وغيابه سيان
والعيش والملح وعزوتنا
دايماً بنصونها ف حتنا
ما نخونش العشرة فى يوم أبداً
ولا نبقى فى طى النسيان
وان جه يوم حد وخاتها
بنقوله يا خايين للعشرة
ده العيش والملح انت أكلته
وازاى بتخون الإحسان
وانا برضه حياتى محطات
وقابلت كتير من أصحابى
الماكر ما دخلش فى قلبى

والمخلص له في قلبي ليان
من فضل الله أنا ما نسيته

و عرفت شهامته وحببته
باتمنى يطول عمر سلامته
وطعامه آيات في القرآن
ينابيع الاحسان والمنه
مصدرها حبيبنا وشفيعنا
علمنا الاخلاص في عملنا
وندوب ملح العطشان
والخير والنور أصله محمد
وصلاه وسلامي على محمد
والدنيا عمار لجل محمد
وفي الشدة يبان الإنسان
والعيش والملح

حبیبة جدو

حبیبة جدو ایسل سیلا
لو نام جدو وخذ تعسیله
تعملی ایه؟
قالت سیلا:-
أعمل قطة وافضل انونو
قالت تیتة:-
لأ لأ عیب یزعل جدو
لكن برضو یا حلوه یا سیلا
انتِ وایسل.....
هاتی کراسة.....
ارسمى وردة إرسمى فار
طالع داخل جوه الدار
شافو القط قال له یامرحب
أنا مش ممکن اسیبك تهرب
قال الفار.....
أنا هنا صورة أسیل رسمتها
تقدر تدخلی فی لعبتها

نط القط هبش الورقة
مالقاش فار شاف ضحكته
وزعلت سيلا على لعبتها
قالت تيته:-
نامت ايسل
وارتاح جدو
وانتِ يا سيلا.....
ها تعملى إيه
قالت سيلا.....
أعمل قطة
قالها جدو.....
تعملى قطة.....
تعملى بطة.....
نشكر تيته على فكرتها
وانتِ يا سيلا.....
حبيبة جدو.....

رؤيا الهلال

شهر الصيام بالهجرى
فرضيه من القيوم
ولقينا قمرنا بدرى
صحّانا نصوم فى يوم
وبلاد كتير تركها
خلاها تخاف تصوم
يا خلق الرؤيا واحدة
وأراء الناس دى شوم
ياما قالوا صيامنا صادق
أرصاد ما فيهاش غيوم
وغريبة فى سبت سابق
عرفات ظهرت فى يوم

وده ركن الحج الأصلى
وعلى مين يا ناس ألوم

نرجع فى الحج يعنى
تفرح فىنا الخصوم
والله الأفكار خاتتنا
حبست فىنا الهموم
ورسولنا فى يوم ندانا
حذرنا من السموم
ونعيش حياتنا أحلى
نشعر بالوحده يوم
رؤيا الهلال دى فرحة
فى ميلاد كل النجوم

الإنتماء

أنا نفسي اشوف شئ
فى الحياه إسمه انتماء
يصعد إليه كل الشباب
لو فى العلا حتى السماء
لو طفل يبكى فى عمر يوم
معقول تدوق الأم نوم
وطنى حبيبي ازاي يقوم
وقلوبنا عايشة فى الجفاء
اطلع يا ولدى شوف التحدى
الأرض خيرها فى الكون مقضى
مقاتلش مره للشمس عدى
أنا نفسي انام حتى المساء
يا شباب بلادى وطنك بينادى

وقت العمل شدوا الأيادي
وصغير كبير خطوه اعتيادي
نحو الطريق نلقى الدواء
وياريت زمانى راح يعود
أصعد فى يوم أعلى السدود
وادعى لربى وانا فى سجود
يجمع فى شمل الأوفياء
أصبحت هيكل أبلكاشه
هش وضعيف ونظر طشاش
والعمر عدى إلى المعاش
وبخاف حياتى تروح هباء
عمر الحياة ما تكون لناس
تقطع خطوط كل الحواس
وتنام فى أرض بدون أساس
ملهاش تدوق خير السماء

إلى المذيعة نجلاء سليم

أنا عمرى صحيح عدى وعدى
مش عارف أبدأ من فين
ولا قلت الدنيا تجيني بدري
علشان تحاسبني على الدين
وكتير في رقبتى لخلانى
والعمر ده فوق الستين
وعموماً ليكو نبضه ف قلبي
ياحبابي في كل العيلتين

عيد ٣٠ يونيو

مشغول ياليل بالوطن
سهران على حدوده
يمكن أنول الرضا
وأفرح أنا ف عيده
واسعد بحضن الهوى
وامسك زمام جيده
ولقيت في عز المنى
فرصه أبوس إيده
وولادي عودها استوى
صارو أجاويده
عايشين لأجل الوطن
ننشد أناشيدده
وان جانا يوم ثلاثين

من يونيو بنقيده
ولا شمعتين بتساويه
فى وقت تجديده
حتى الشباب بتناديه
تفرح بترديده
وجيوشنا برضه تراعيه
ورئيسنا يوم عيد
يا مصر ابنك أصيل
باقى على وعوده
طول عمره فى الإنجازات
صادق فى تأكيده
يا شرق أوسط . يانيل
وثق فى مجهوده
ارفع شعار السلام
يبقى العلم سيده

أحلى نجمه

أحاسيس جميله عشقتها
في البعد عنها عيشتها
وف قربي منها شوفتها
محلّى هواها ف عرشها
انا قلبي مكنون الهوى
ببلاغى صورتك في الهوى
يا أحلى نجمة في السما
شغلت عيوني بضيّها
ضحكت وقالت يا ترى
حبي في قلبك يوم سرى.؟
أنا قولت ده شئ مفترى
معقوله أنكر حبها

قالت حبيبي من زمن
شوفتك بتقلب في المَحَن

وانا مهما اعاني من الألم
أحلف بتحنان قلبها
والله حُبِك ما انطوى
باكتبله غنوه مع القمر
احلم في أوقات السحر
إني بخضّر زرعها
عاشق لروحك والنبي
خليك جنبي وقربي
أنا لو ملكنى تعصبى
مقدرش أفارق حسنهما

صباح الخير

صباح الخير يا نبع الذوق
بلاش تنزل فى بحر الشوق
لتلقى في يوم شبك مشنوم
بيصطادلك سمك محروق
وناس حسادة وقلوبها
عليك بتزوم
وهو البحر زيت مغلي
في كفر شقوق
تعالى اليوم ده هتلاقي
في بحر موسى سمك زقروق
هايفرحك عمك الناظر
ومش هايلوم
ساعتها الدنيا هاتسامحك
وتفتحك طريق الشوق ..
تحياتي أخوك حندوق

نسمات الفجر

نسمات الفجر اما يشقشق
ينادينني الهاتف قوم صلي
أتناسى الأحلام الزائلة
وأزيح النوم من على خدي
وتأخذني النشوة وبتوضا
من قبل الأنوار ما تعدى
وسمعت العصفور بيرتل
سبحانك سبحانك ربي
وبدأت صلاتي بدعائي
ونداني ربي إي عبدي
فرجوت رضاه ورحمته
أكرمني في هزلي وجدي
وارضينا بدخول مساجدنا
وأعز الدولة بالجند
** ياآآرب **

رحلة كروان

رحله ما بين أرض وسما
نحلم نعيشها احنا البشر
وان جتنا فرصه ونتحد
نلقى الخصام فينا انتشر
عصافير بتفرح بالحياه
من غير ما تحسب للقدر
محتاجه تسعى كل يوم
على رزقها من غير بطر
يارب فضلك يا ودود
لو حتى كان تحت الحجر
وسمعت صوت عصفور عجيب
سألته يومها عن الخبر
طالع تغنى تقول يا إيه
فاتنى وطار فوق الشجر

وانا في ربوع بحر الهوى
شوفت الجمال فوق الثمر
نخل القرين كله استوى
وقلوبنا مشوارها انجبر
وف مره عصفور انزوى
سمعني صوت معناه خطر
عشه انهدم وقت الشتا
وفراخه ماتت في المطر
كل الطيور راح بتواسيه
وكأنه من صنف البشر
وعلى الفروع واقفين صفوف
وف صمت عشاق القمر
شوف يا ابن آدم واتعظ
ساعة القضا بيعمي البصر
ولا مزرعة ولا عش ريش ..
راح يفتديه رعد انتشار
ربك وهب له نعمتين ..
رغد الحياه وعفاه سقر

لُقِيَ الأَفْكارُ

تعالى نفتكر مرة
غرام عشناه
ونمحي حتى بالمره
عذاب شفناه
وننسى قسوة الجاني
على السُّمار
ونزعل . كنا نتعاتب
ماقلناش آه
وعمر ماحد ضللنا
مشينا وراه
ساعات كنا نتقابل
مع التيار
وليل الكره بيعدي
ياريت مايجيش
لقيتك برضه متهاوده
وعايشة ف طيش
ونور الشمس بيصبح

على الأزهار
سمعت هواكِ بيغني
ياشوق ميّل
ودق الحب في قلبي
من الأول
رسمك فرحة في عينيّ
وبُحت يومئذ بالأسرار
وهزبتُ منك البسمة
لقيتها فوق بتضحكك على الأغصان
وطار القلب يندهك
بلاش حرمان
وعاشت روعي تتمنى
..... لُقي الأفكار !!

محتوى الكتاب

2 بطاقة الكتاب
3 مقدمة
4 إهداء
5 ابتسامة كل عام
6 كل عام
7 الحسبة فى واحد
8 موال فى الحب
9 عيد ميلاد
10 أحلى شمعه
11 المحامى الشاعر
13 الخدمة العسكرية
14 معنى حب
15 إلى الشاعر الصغير
16 إلى شاعر إبراهيم
17 إلى شاعر البحر
18 إلى وطنى
19 إلى البحر
20 مشتاقين
22 إلى شاعر البحر
23 الأنا

24	رسالة برنيس
26	خليها تعدى
27	صاحب الجزار
28	زعبله
29	فرصة ومضت
31	كام فى المية
33	نبح الخير
34	حاولت كتير
36	الفكر الغبى
37	إلى شاعر البحر
38	الواد شلاطة
40	الله على حرفك
41	أحدث خبر
44	فيروس كورونا
47	إلى شاعر الشرق
48	إلى شاعر البحر
49	إلى الشاعر عبد الله صقر
50	جدو آدم
53	منحة شاعر البحر
54	يامسحراتى
55	دعاء رمضان
56	صرصار وجرادة
58	شهادة عبد

59 بلاش الخوف
61 فداك يامصر
63 خبر مشبر
65 ورد المحبة
67 حكاية قرد
70 على آخر ضوء
73 عش العصفورة
75 إسمحيلي
78 العيش والملح
81 حبيبة جدو
83 رؤيا الهلال
85 الإنتماء
87 إلى المذيعة نجلاء سليم
88 عيد 30 يونيو
90 أحلى نجمة
92 صباح الخير
93 نسمات الفجر
94 رحلة كروان
96 لقا الأفكار
98 محتوى الكتاب